

'Berdisiplin Berharmoni' tema Hari Kebangsaan

KUALA LUMPUR, Rabu—'Berdisiplin Berharmoni' dipilih sebagai tema Hari Kebangsaan ke-24 yang akan disambut di seluruh negara 31 Ogos ini.

Pengerusi Jawatankuasa Pusat Sambutan Hari Kebangsaan, Tan Sri Ghazali Shafie, berkata tema tersebut selaras dengan hasrat Perdana Menteri, Datuk Seri Dr. Mahathir Mohamad mewujudkan sebuah pentadbiran penuh berdisiplin, berbudi bahasa, tidak boros dan tidak leka.

Ia juga melambangkan hidup masyarakat Malaysia yang harmoni berlandaskan satu nada dan satu irama.

Tan Sri Ghazali telah menjadi pengerusi jawatankuasa pusat sambutan kali kesepuluh, memberitahu sidang akhbar di sini hari ini satu perarakan dan permainan pancaragam raksasa akan diadakan di padang Kelab Selangor pukul 8.00 pagi.

Perarakan raksasa itu akan disertai oleh 17 kereta berhias dan 30 buah kereta lama terdiri dari kereta lembu, beca, kereta kuda dan lain-lain.

Gambaran itu untuk mengingatkan kembali zaman-zaman dilalui dan kemajuan dicapai sejak 24 tahun Merdeka.

Tan Sri Ghazali yang juga Menteri Hal Ehwal Luar, berkata keseluruhannya kira-kira 20,000 peserta akan mengambil bahagian berwarna warni itu terdiri murid sekolah, belia, pandu puteri, jabatan-jabatan dan agensi kerajaan, tentera, polis dan lain-lain.

Pertunjukan kereta berhias akan juga diadakan di sebelah malam dengan hiasan lampu berwarna warni.

Tan Sri Ghazali Shafie berkata Seri Paduka Baginda Yang di-Perutusan Agung dan Raja Permaisuri Agong berkenan berangkat menyaksikan pertunjukan bagi kedua-dua siang dan malam.

Perdana Menteri, Datuk Seri Dr. Mahathir Mohamad, Timbalan Perdana Menteri, Datuk Musa Hitam, menteri-menteri kabinet dan lain-lain pembesar akan hadir.

Di upacara sebelah pagi, setelah Seri Paduka Baginda Yang di-Perutusan Agung memeriksa kawalan kehormatan, acara menaikkan bendera dijalankan. Ini diikuti dengan membaca ikrar Rukun Negara oleh 7 orang ketua pancaragam raksasa.

Tembakan meriam 14 das kemudian dilepaskan diikuti dengan pertunjukan 'hormat lintas lalu' oleh kapal terbang Tentera Udara Diraja Malaysia (TUDM).

Upacara disusuli pula oleh persembahan pancaragam raksasa oleh kira-kira 2,000 peserta dijalankan serentak oleh 40 kumpulan dan diselangi pula dengan persembahan 800 pandu puteri.